



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8 Yorgia anidakangma :

Tir Yimym

tiryimym@aolima

tir yimym

TAPAK 3

Djokovic nem Sportsman of the Year naroküm agütsü

'Abhishek Banerjee khaseter lila..': Mamata Banerjee



VOL. XXI ISSUE NO. 191 (ADOK 191) DIMAPUR RASEMNÜ (WEDNESDAY) RONGCHII (APRIL) 24, 2024 ₹ 5.00

Manipur nung meimchir temeten alema inyaksangshir: US state department

Imphal, April 23, 2024 (Agencies): United States state department-i kümshia human rights evaluation report agütsüba nung Manipur nung meimchir temeten anema inyaksangshiba osang metetdakja lir. Yaküm May nungi November tsüngda Manipur nung nisung 60,000 tema pei talidak toktsür ao ta US state department-i ashi.

Manipur nung Kuki-Zo nunger aser nübo teimba Meitei nunger tsüngda raradang nisung 200 tema taküm samaogo ta parnokisa ashi.

India kübok tesem balala nung nübo agi tangar memenepertem, journalists aser ketdangsübaren anema ola adokertem amaker, US state department human rights evaluation report nungsa shia lir.

Sorkar aser parnok pusemertemi sorkar anema osang sangoktsüba media outlets

rongshiba aser timtem agütsüba osangtem angazükogo ta US state department-isa ashi.

India nung tamangba yimsü tsütsü nübo agi tangar memenepertem bendanga amshir aser parnok dak ozing alema inyaksangshir aser parnok anema tim masüba osangtem prokshir ta parnokisa ashi.

"Onoki India dang human rights maparen aser tenangzükbatem inyaksü ayongzük" ta US official Robert S Gilchrist-i ashi. Pa ya US bureau of democracy, human rights and labour nung tongti ketdangsür ka lir.

"Onoki mapang shia US aser India nung civil society nisungtem den ajuruteper aser parnok otsü angadanger. Onoki India sorkar dang civil society organisations den ajuruteptsü ayongzük" ta Gilchrist-isa ashi.

Arambai Tengol-i state künzüka ayutsü nangzükshio

Imphal, April 23, 2024 (Agencies): Meitei nunger telok Arambai Tengol züngsem meyrjang aika süoshi tanak subor adenshi aser parnoki Manipur litzü künzüka ayutsü tenangzükba agishio.

Arambai Tengol commander-in-chief Koroungba Khuman-i anir sentong ka agidang züngsem meyrjang aikati iba tezüngzüktep agia liasü. Khongjom War atalokba sülen küm 133 buba ajungba bilemtetba sentong nung Arambai Tengol züngsemtemi tezüngzüktep agiogo.

"Khongjom War" ta Manipur nüjiso atema tatembangba rara liasü aser iba ya 1891 küm British den raraba liasü. Iba anogomung nung Arambai Tengol züngsemtemi Khongjom War nung shilem agirtem nem tetushi agütsü.

Iba otsüsütsü rara ya Manipur kübok Thoubal district nung

Khebaching nung atalok.

Arambai Tengol-i Manipur Lok Sabha mendentem atema elections mejembir ta parnok commander-in-chief Koroungba Khuman-i ashi.

Inner Manipur Lok Sabha menden atema mezüngbuba shilem agiogo aser April 26 nü scheduled tribes atema lezmüksüba Outer Manipur Lok Sabha menden atema election agütsü lir.

April 19, 2024 nü Inner Manipur Parliamentary Constituency Lok Sabha elections nung Arambai Tengol züngsemtemi shilem agiogo ta tai tongloksür.

April 19 Lok Sabha election mapang Arambai Tengol züngsemtemi prangpong amer tashiyim inyakba video tem kanga prokshir saka Arambai Tengol-i iba ama mapa inyaksü tetuyuba kecha magütsü ta ashir.

Assam Lok Sabha election nung Chakma-Hajong onük atema ashishiteper CAA kübok Arunachal Pradesh nungi Assam-i refugees anir arutsü

Guwahati, April 23, 2024 (Agencies): Assam nung Lok Sabha election shilem tanabuba atema nüboyimba mapang Chakma aser Hajong refugee tem Arunachal Pradesh nungi Assam-i anir arutsü onük atema ashishiteper.

Iba onük atema Assam nung opposition party temi Himanta Biswa Sarma-i aniba Bhartiya Janata Party (BJP) sorkar aitsür.

Citizenship Amendment Act (CAA) kübok kobi melii Arunachal Pradesh nung aliba Chakma aser Hajong refugees 67,000 tema Assam nung lidaktsütsü akok ta Union minister Kiren Rijiju-i tawa tu shia liasü.

Kechiba Chakma-Hajong nunger Assam-i anir arutsü?

Chakma nunger teimba ka Buddhist nunger lir aser parnok 1960s mapang East Pakistan (Bangladesh) nungi aru. Tamangba yimsü tsütsü reshikangshi ajuruba ajanga parnok Arunachal Pradesh nung arua jenok saka nisugtemi iba atema ashishiteper.

Chakma-Hajong nunger Arunachal Pradesh nung Permanent Resident Certificates (PRC) mangutsü anungji parnok India kübok tangalen lidaktsütsü ta Rijiju-i ashi.

Arunachal Pradesh ya lisopurtem indang state ka ta künzüka aliba den iba lemtet ya agiba lir. Ajisüaka iba ajanga Assam nung nütsüng yongsük teimba akümsü akok.

Pai Assam den iba tebilemsü khuret lemsatapa arur ta Kiren

Rijiju-isa ashi. "Onoki Assam chief minister den Chakma nunger Assam nung lidaktsütsü atema olemtep tenzükogo" ta Rijiju-isa ashi.

Assam nung Chakma-Hajong nunger lidaktsütsüba tesemtem tema nung madoki reprangshimdar ta paissa ashi.

1996 küm Supreme Court-i Arunachal Pradesh dang Chakma-Hajong nunger nem senso agütsütsü tetuyuba agütsü saka ibaji parnoki magizük.

Assam opposition teloktemi BJP sorkar aitsür

Citizenship Amendment Act (CAA) kübok Arunachal nungi Chakma nunger Assam nung lidaktsütsü ta Union minister Kiren Rijiju-i tawa jembiogo ta Assam Jatiya Parishad (AJP) lennir aser Dibrugarh Lok Sabha candidate Lurinijyoti Gogoi-i ashi.

Assam aser Centre sorkartemi tasa atongba ajanga CAA ajanga lisopur temetentem nung lendong bentsür arutsü ta Gogoi-isa ashi.

CM Himanta Biswa Sarma-i Assam anema tasa tamajung ka atonger ta Assam Congress president Bhupen Kumar Borah-isa ashi.

"Arunachal Pradesh-i kidanger linüktem nungi refugee shinga magizüksü ta Union minister Kiren Rijiju-i jangjangja shiogo. Saka Assam CM-i tashi angar ka ama Amit Shah-i Hajong-Chakma refugee lakh 5 Assam nung lidaktsütsü tuyuba mulunga agizükogo" ta Borah-isa ashi. "Iba ya Kiren Rijiju-i

osangbener senden ka nung memeteti yimjak nung jembiogo" ta paissa ashi.

"Ajisüaka, Assam nung alirtemi iba ya kodanga magizüksü. April 26 aser May 7 anogotem Assam nungeri CM Sarma indang tasa magizük ta vote ajanga sayutsü" ta Assam Congress president-isa metetdaksü.

Opposition MLA Akhil Gogoi-i Assam CM Himanta Biswa Sarma dang nungi state sorkar tebilemba asüngdangogo.

Assam nung Chakma-Hajong nunger lidaktsütsüba magizük aser Assam ya bendangertem asoshi 'dustbin' masütsü ta Akhil Gogoi-isa metetdaksüogo.

Himanta Biswa Sarma-i Centre nung Bharatiya Janata Party (BJP)-i aniba National Democratic Alliance (NDA) sorkar tashi angar. CM Sarma-i CAA kübok bendangertem Assam nung lidaktsütsü atema anir arura pai legal action ajurutsü, ta Akhil-isa ashi.

Assam CM Sarma-i iba onük mejembiba ashir

Ajisüaka Assam chief minister Himanta Biswa Sarma-ibo Chakma aser Hajong refugee tem Arunachal Pradesh nungi Assam-i anir arutsü sentong mesüra olemtep kecha mali ta ashir.

"Arunachal Pradesh den Chakma aser Hajong refugee tem anir arutsüba olemtep kecha maliasü. Onoki Arunachal Pradesh nung aliba Moran aser Muttok nunger nem senso agütsütsü onük dang jembitep" ta Sarma-isa ashi.

Shamator district nung nüburtem kanga timtemdar



Dimapur, Rongchii/April 23 (TYO): Deputy Commissioner, Shamator, Y.Chingyak Konyak

ajanga sangdong ka nung ashiba agi, April 19 & 20, 2024 anogotem tzünglu kanga sashia aruba ajanga Shamator district kübok tesem balala nung teraksa jenti bena arutsüogo.

District nung yimtsüng ter indang lenmang tem khenyongi shibangogo.

Power aser cellular tesendaktep kanga mejungi

raksaogo aser culverts aser apu tila aika raksaogo, ta Konyak-i ashi.

Anentsüh aluba ajanga district sendaktepba lenmang timba mokdanga lir. Tongtipang apu asem Langa bridge - Shamator Hq aser Tuensang sendaktepba; Muksuke bridge - Chessore Sub division aser Tuensang sendaktepba aser Shipong bridge - Shamator Hq aser Mangko EAC circle sendaktepba kanga mejungi raksar telaor lir, ta sangdong

ajanga ashi. Tzülu aser ango tzübo noklang aika tzü agi mubangogo aser election duty nungi meypa shilanger indang gari aika tesem balala nung anendaka lir, ta DC Shamator ajanga ashi.

District Disaster Management Authority ajanga akokba mera agia yaripter, saka machineries aser resources peria maliba ajanga lenmang mürekba aser dang maparen shidak meinyakteter, ta ashi.

Tzü metsüng ajanga Longsa lushi nung teraksa tulu bener arutsü

Mokokchung, 23rd April (TYO): April 19-21 anogo asemnü tzünglu tanen makai aruba ajanga tzü metsüng aser anentsüh agi Longsa lushi tesem balala nung aluyimer kibong noklang ana dak tali indang tzülu/ alu balala raksatsüogo. Iba den ano tzülu nung tzü mesüokba (irrigation) mapatong kar bonger ao aser Longsa yimdam tzü atsüba (water source) ajak raksatsüogo, anungji, yimertem kanga okrongteper ta Longsa putu yimsüsürtemi osangbenertem den jembidang metetdaksü.

Tang tashi nung Longsa lushi nung teraksa ajuruba asadanga nung - Meremtu nung aliba tzü atsüba line - 4 aser irrigation project 6 shi raksa, nija lu/tzülu kanga mejungi raksarji kibong 182, terara rakar kibong 31, aonsotsü & süngjanglijang lu raksar kibong 18, ango metsür (fishery bond) kibong 24 shi, anentsüh agi alu lenmang tongti 2 anebanga lir, apu-a karbo bonger ogo aser mersü lu ayimertembo ano mejangiateti lir, ta Longsa yimsüsür kati ashi.

(Maneni tapak 2 nung...)

Kohima nung State Entrepreneurs & Handicraft Award 2023-24 agütsü



Kohima nung Directorate of Industries & Commerce indang Conference Hall nung April 23, 2024 nü State Entrepreneur and State Handicraft Award 2023-24 sentong agidang tangokba noksa ka yangi angur.

Dimapur, Rongchii/April 23 (TYO): State Entrepreneur 2023 aser State Handicraft Award 2023-24 sentong ka Conference Hall, Directorate of Industries & Commerce, Kohima nung April 23, 2024 nü agia liasü.

Iba sentong nung jembidang, lenla balala nungi Naga craftsman temi yimya balala nung mapa inyakba ngua Department ajungmesor, ta

Commissioner & Secretary, Industries & Commerce, Kekhrievor Kevichusa-i ashi. Pai sempet angur aser department ketdangsürtem dang tesendaktep tajung ayutsü ashi aser ibaji ajanga nüburtem ajangzüksü asoshi teyari komala agütsütsü aji department-i metettsü, ta ashi. Pai takok angur ajak nem tenüngsang agütsü aser tarutsü nung osangtsüsang agitsü aser

teyari atema department indang kishi teti lapoka alitsü, ta matetdaksü. Director, Industries & Commerce, A.Temjen Jamir-iba sentong ayongzükba nükjidong teratet lemsatepdang, Department-i Government of Nagaland nungi temelaba agir 2022 küm entrepreneurs nem award ya agütsü tenzük, ta ashi. State entrepreneurs award ya entrepreneurial excellence aser

entrepreneurial world nung takok tajung anguba ajiteta benjongba sentong ka lir, ta pai ashi. Iba award yagi entrepreneurship yimya ajungmesor aser temaba jenjangi ajungketer, entrepreneurship tanüla agizükter ta pai ashi. State Entrepreneurs Award 2023 angur yamai alitsü:
i. Peren district nungi M/s Ngurie company indang Peihauding, shibai naro metsürtemi timtem ajuruba nung Bio-enhancer ama organic composition yanglua aluyimba nunga teyari agütsür.
ii. M/s ISTI Natural Dimapur nungi Mulungnenla Pogen, shibai indigenous herbs amshia herbal skin care solutions yanglur.
iii. M/s Runway India Dimapur nungi Nengneithem Hengna, shibai Nagaland indigenous inspired Jewellery tem

mainstream fashion nung amshia tribal art ajungketer. State Handicraft Award 2023 angurtem ya Vekuvolu Dozo, (Textiles Loin Loom); Shirme Ruivavao, (Wood carving); Imtiyala Handicraft crocheted craft; Cenam Wangcha (Handicraft Beats work); Vikheli H. Ayemi (textiles Loin Loom); Kekuweu Lomi (textiles Loin Loom) aser Imtisenla (Handicraft Jewellery) alitsü. One District One Product (ODOP) kübok Kohima, Chumoukedima, Mokochung, Mon, Peren, aser Phek district tem nungi mersü lu ayimer nisung ter aser pineapple, coffee, kiwi, plum, avocado, tomatoes, basmati rice lu ayimer nisung ter nem National Program for Organic Production (NPOP) standard nung shia aliba ama organic certificate agüja liasü.

Tzü metsüng ajanga Longsa lushi... (TAPAK 1 NUNGI...)



District administration aser Agri dept nung ketdangsürtemi Longsa lushi nung tzü metsüng lendong ajanga teraksa bener arutsüba tesemtem semdanga jajaba mapang tangokba noksa nung angur. Mokochung, 23rd April, 2024

Iba lendong ya ataloker külen tanü agi anogo 3 tashi yimden nübu tsüka iba dak sentakba nung maparen balala achayanga arudar, takoksa tulu ajurua aluyimer kanga timtemteper, anungji, sarkar aser concerned dept-i teyari yoktsüla aser temlungertemia pei akokba agi yaridaksünür, ta Longsa putu yimsüsürtemisa mepishia metetdaksü. Alu karbo tanaben meyimtetsüsa kanga mejungi raksago, aser karbo terara dang raksaka tzü line ajak bonger oatokogo, anungji,

maparen kar inyak mesüra aluji meyimtetsü südi. Tzülu kar nungbo ayongti-i mobanger teyimdak lir, anungji, aluyimer aika koda masüba tia nung lir, ta parnokisa shisabulu kar lemsatep. Iba lendong nung yariteptsü asoshi Minister Metsübo aser MLA & Advisor Imkongmar nati teyari tulu yokba asoshi pelar. Iba den tanü Mokochung district administration nungi aser Agri dept nungi ketdangsürtem arua parnokia teraksa ajuruba tesemtem ajak semdangogo, anungji, parnok ajak dang pelaba

yimsüsürtemisa metetdaksü. Iba osangbeneri takoksa ajurua alir aluyimer ka den jembidang, taoba mapanga alu raksabaji pai meteta pezüben atalokogo, saka tang atalokba amai tulubo matalokdang, ta pashi. Tang atalokba yabo aluyimertem aika alu meyimtetsü. "Alu meyimra onok tanga teinyaktsü maka, onok koba tia ai tsü ta shibulua bilemer, anungji, alu yimtetsüsa lenmang kar concerned dept ajanga inyakdaksünür", ta pai aluyimer ajak tenüng nung mepishir ta ashi.

18th Lok Sabha elections nung gari amshiba taa meshitsü metetdaksür

Dimapur, Rongchii/April 23 (TYO): 18th Lok Sabha atema General Election 2024 mapang Kiphire district kübok Kiphire HQ & Seyochung sub-division nung election duty atema jurila kari amshiba taa Deputy Commissioner & District Election Officer, Kiphire indang office nung April 24-26, 2024 anogotem anepdang 10:00 ako nungi nikongdang 3:00 ako tsüngta agütsütsü, ta Deputy Commissioner & District Election Officer Kiphire, Tamsuwati Longkumer, NCS ajanga sangdong ka nung metetdaksüogo.

mapang polling duty nung amshiba gari kibur/driver temi April 24 & 25, 2024 anogotem office mapang DC & DEO Noklak indang office nungi taa meshitsü metetdaksür, ta Deputy Commissioner & District Election Officer Noklak, Arikumba-i sangdong ka nung ashi. Gari kibur/driver temi requisition order, Duty Detailment Slip nung officer in-charge ajanga meyongnem agütsür aliba den vehicle registration ID/proof bener arua taa meshitsü metetdaksü. Deputy Commissioner & District Election Officer, Chumoukedima nungia sangdong ka nung, Lok Sabha atema General Election 2024 agiba mapang election duty nung amshiba jurila garitem indang taa agütsütsü, ta metetdaksüogo.

Pungro sub-division atema jurila garitem amshiba taa kasa anogo aser kasa tesem nungi agütsütsü. Anungji gari kibur/driver temi requisition order bener arua taa meshitsü metetdaksür, ta ashi. Lok Sabha Election 2024 mapang Phek district asoshi jurila garitem amshiba taa April 23-26, 2024 anogotem office mapang Deputy Commissioner, Phek indang office nungi agütsütsü, ta SDO (C) & Nodal Officer, Transport Management Cell Phek, Tsenthungo E. Ngullie, NCS ajanga sangdong ka nung metetdaksü.

Anungji gari kibur/driver temi requisition order aser ID card bener arua taa meshitsü akok, ta sangdong ajanga ashi. Mon district kübok Lok Sabha atema 2024 General Elections agidang jurila gari amshiba taa April 25-30, 2024 anogotem agütsütsü, ta Deputy Commissioner & District Election Officer, Mon, Ajit Kumar Verma, IAS ajanga sangdong ka nung metetdaksü.

Anungji gari kibur/driver temi requisition order aser duty detailment order original nung bener arua office of the Deputy Commissioner & District Election Officer Mon nungi taa meshiang, ta ashi. Longleng district kübok 18th Lok Sabha election 2024 mapang amshiba gari taa Deputy Commissioner & District Election Officer, Longleng indang office nungi April 25 & 26, 2024 anogotem office mapang agütsütsü, ta metetdaksüogo.

Deputy Commissioner & District Election Officer, Dimapur, Dr. Tinojongshi Chang, NCS-ia sangdong ka nung, 18th Lok Sabha Election 2024 mapang Dimapur district kübok election duty nung amshiba item gari indang taa ya Office of the Deputy Commissioner & DEO, Dimapur, Transport Cell nungi meshitsü metetdaksüogo. Alfa Auto/Tata Ace/Tata Magic amshiba taa April 29, 2024 anepdang 10:00 ako nungi nikongdang 4:00 ako tashinung meshitsü aser Tata Sumo/Tata Yodha/Tata Mobile/Alto/Bus/Winger amshiba taa April 30, 2024 anepdang 10:00 ako nungi nikongdang 4:00 ako tsüngta arua meshitsüla.

Noklak nunga Lok Sabha 2024 atema General Election agiba

Requisition order aser duty slip original sayuba sülen ang iba taa ya agütsütsü, ta sangdong ajanga ashi.

NAGALAND POLLUTION CONTROL BOARD							
Signal Point, Dimapur - 797112, Nagaland Tel: 03862-245727, TeleFax: 03862-245726 Website: www.npcb.nagaland.gov.in e-mail: npcb2@yahoo.com							
AMBIENT AIR QUALITY FOR KOHIMA AND DIMAPUR CITY							
KOHIMA ASER DIMAPUR NUNG MOPUNG MERÜK-MEMERÜKBA JENJANG							
Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaksütsüla"
				16.04.2024	18.04.2024	21.04.2024	
1	Dimapur	Bank Colony	Residential	178	81	47	100 µg/m ³
2		Dhobinala	Commercial	213	112	109	
3		NPCB Office, Signal Colony	Residential	151	74	64	
4		Tenyiphe, Chumoukedima	Commercial	142	45	42	
5		Nagarjan	Residential	147	83	65	
6		Viola colony	Residential	113	36	35	
7		Burma camp	Commercial	158	80	73	
8	Kohima	Opposite NST Office	Residential	143	82	68	
9		PWD Junction	Commercial	148	103	74	
10		High School Junction	Commercial	178	139	109	
11		Midland (Upper)	Residential	124	69	61	
12		Forest Colony	Residential	121	95	88	

Iba osang ya nüboritem ajangzüksü atema Nagaland Pollution Control Board-i agütsür.

'Abhishek Banerjee khaseter lila...': Mamata Banerjee



Kolkata, Rongchii/April 24 (Agencies): West Bengal chief minister Mamata Banerjee-i Mongolbarnü ashiba agi, pa indang nephew Abhishek Banerjee-i, Kolkata nung par ki temeket meita aoba nisungba den ajurutept asübo khaseter lila West Bengal nung nüboyimba sentong ka nung shilem agiba mapang Mamata Banerjee-i BJP aija, item nisungtem yagi ajak tepsetner mesüra tepuokdaki yokner.

"BJP nung gaddars (traitors) kati bomb ka apoktsü ta ashi. Nenok kü dang mepelaba kar

lira bomb agi ni tepsetang. Nenoki Abhishek tepsettsü merangogo saka onoki jelia metetatok," ta Mamata Banerjee-i ashi.

"Parnoki par ki dena meitaogo aser pa dangi video call süa ajuruteptsü asüngdanga liasü. Abhishek-i mapang agütsü asübo pa khaseter lila," ta lai ashi.

Mamata Banerjee-isa, item nisungtem yagi parnok anema jembirtem tepsetner mesüra tepuokdaki yokner, ta ashi.

"Nüburtem ket nungi vote angutsü ta temulung lema

bilemera kechiba nüburtem amokmerener?" ta lai asüngdang.

Hombarnü Kolkata police-i Mumbai nung amendaker aliba nisung ka Abhishek Banerjee'er ki temeket meita aoba atema apu. Iba nisungba ya Rajaram Rege ta jangjaogo. Police-i ashiba agi, iba nisungba ya Maharashtra nung political party ka den sendaktepa lir.

Police-isa, Rege ya Mumbai amakba nung aija alir David Headley dena ajuruteptogo, ta ashi.

Police ketdangsür kati ashiba agi, 26/11" attack amala mesükba lendong ka bener arutsütsü atema tasa asa alitsü akok.

Deobarnü Mamata Banerjee-i, la aser Abhishek Banerjee anema inyaksangshiba atema BJP aitsüogo.

Mamata Banerjee-i Trinamool Congress lenir aser züngsemtem aser West Bengal nung aliba nüburtem dang küm küma alitsü ayongzükogo.

India-i Philippines nem BrahMos missile battery pezübuba agütsütsü

New Delhi, Rongchii/April 23 (Agencies): South China Sea nung China inyakyim taliba küma aoba mapang ka nung India-i Mongolbarnü BrahMos supersonic cruise missiles land version indang 'battery' pezübuba Philippines dangi yoktsü.

Linük ana tsüngda USD million 375 alang tenangzüktepba ka yangluba sülen Philippines nem battery asembo agütsüogo aser tang pezübuba yoker. Battery shia nung launcher pezüzü aser 290 km range missiles asem keta lir. Iba hadir ya supersonic speed nung aoer asünung, ali aser rong nung amenkdaer aliba Ballistic Missile Defence (BMDs)

systems temi nokdangtsü kanga tasak lir.

BrahMos Philippines deal ajanga 2023-2024 küm India indang defence exports crore 21083 jungogo aser taoba fiscal den mendemdanga shilem 32.5 agi timba renlokogo aser tarutsü nunga supersonic missiles tem timba order asütsü imla atadar.

India-i missile bo export sütetogo aser tang sorkari Mazagon Dockyards Limited aser French Naval Group den longjemer Mumbai nung Scorpene-class diesel-electric submarine tem yanglua Indonesia aser Malaysia amala linüktem dangi yoktsü sentong lir.

Aatmanirbhar Bharat rubric

kübok India nung high-tech conventional aser non-conventional sub-surface platforms yanglutsü atema sabang amenoktsü asoshi Naval Group aser Emmanuel Macron sorkar den sensaksemtsü atema Chief of Defence Staff Gen Anil Chauhan tang France nung oa lir.

Bilateral defence cooperation tali akangshitsü atema Indian CDS yagi Brest aser kokra Toulouse nung French submarine base semdangtsü imlar. India atema Kalveri (modified Scorpene) class submarines talila asem yanglutsü atema French Naval Group ya MSL den sensaksem tenzükogo.

LIVINGSTONE FOUNDATION INTERNATIONAL
THAHEKHU / KEVIJAU, DIMAPUR - 797112 NAGALAND

2024 ADMISSION OPEN NOW FOR GRADE - XI

- ARTS (HUMANITIES)
- COMMERCE
- SCIENCE

WE GROOM CHILDREN FOR LIFE !

- Forms available between 9:00am and 2:00pm at the LFI Accounts Section.
- 100% Concession for Grade-XI in both Hostel & School Fees will be granted to Meritorious Students from recognized Boards.
- 25% Concession for Grade-XI in both Hostel & School Fees will also be granted to students with excellent flair in Sports, Art, Music & other such skills.

ENROL NOW

WHEN YOUR CHILD'S FOUNDATION IS STRONG, THEY ARE PREPARED TO FACE THE WORLD

UNIQUE FEATURES OF LFI

- INTRODUCING FIRST TIME IN NAGALAND Adventure & Jungle Survival Tactics and Combat Skills by URBAN JUNGLE.
- Martial Art - Nagaland Pensak Silat
- Music classes - CLEF NOTE Music Academy
- Football Coaching - Dimapur Football Club
- Fitness Classes - PAWF Nagaland
- Fine Arts & Calligraphy - Wandering Minds
- Horse Riding

JOIN US ON SOCIAL MEDIA

- livingstone.nagaland@gmail.com
- livingstonenagaland.com
- livingstonenagaland

CONNECT WITH US 03862-244203 +917005996092 / 93

MDH, Everest masala nokdangba atema India-i osang tejangja meshi

New Delhi, Rongchii/April 23 (Agencies): India ya alima nung spices timtiba adokdaksüba, achiba aser exporter asüba linük lir, aser Singapore o Hong Kong na nung food safety regulators-i chiyongtsü jenjang dak sendakba nung Indian brand MDH aser Everest indang spices kar tenokdangba agütsüba sülen India-i osang tejangja meshiogo.

Commerce ministry-isa, Singapore aser Hong Kong na nungi India embassy dang ken o dak sendakba nung osang tejangja yoktsü tetuyuba agütsüogo.

Maneni ministry-i, Indian firm MDH aser Everest na danga osang tejangja meshiogo. Atakzükja aliba dang nungi pesticide 'ethylene oxide' talila

densema aliba ajanga iba company ana indang spices nem tenokdangba agütsüogo.

"Company tem dang nungi osang tejangja meshiogo. Tenokdangba agütsüba tera aser iba ya metongshitsü atema exporter tem den longjemer jenjang tapet agütsü," ta commerce ministry ketdangsür kati ashi.

Exporter tem shirnok indang osettem nem tenokdangba agütsüogo parnok indang Technical details, analytical reports aser osang tejangja Singapore aser Hong Kong nung Embassy tem nungi meshiogo, ta ketdangsüri metetdaksü.

Maneni Singapore Food Agency aser Centre for Food Safety, aser Food & Environmental Hygiene Department, Hong Kong dang nungia osang tejangja meshiogo, ta ketdangsüri ashi.

Ministry ketdangsüri ashiba agi, Singapore aser Hong Kong dangi yokba spice tem nung ethylene oxide tendangba indang ken o sensaksemtsü atema industry consultation ka agütsü renema lir.

Kasa mapang nung Hong Kong aser Singapore-i, Indian brand MDH aser Everest Spices indang spice-mix products pezü mayoktsü atema tenokdangba agütsür aliba ya Spices Board of India-i asadangdar.

Food safety regulator of Hong Kong-i, consumer tem dang item osettem malitsü aser shishilembaritem dang mayoktsü tetuyuba agütsüogo aser Singapore Food Agency-i item osettem meyipa agütsü tetuyuba agütsüogo.

2022-23 fiscal nung India-i sen crore 32,000 alang spices export süogo. Mersü, cumin, spice oil aser oleoresins, turmeric, curry powder aser cardamom nung amala spices tem India-i export asür.

Kejriwal aser Kavitha na May 7 tashi judicial custody nung ayutsü



New Delhi, Rongchii/April 23 (Agencies): Delhi excise policy senotsü ochi mashi ken o dak sendakba nung Delhi nung okadak kati chief minister Arvind Kejriwal, Bharat Rashtra Samithi (BRS) lenir K Kavitha aser Goa nung election atema Aam Aadmi Party indang fund manager Chanpreet Singh nung May 7 nü tashi judicial custody nung ayutsü tetuyuba agütsüogo.

Rouse Avenue court-i,

tangbo aginer aliba iba policy dak sendakba CBI ken o nung Kavitha May 7 nü tashi judicial custody nung ayutsü atsülangtsüogo.

Aam Aadmi Party convenor-i pa anogoshia pa kinungtsü Sunita Kejriwal densema lia minute 15 medical consultation agütsü mepeshiba okadaki magizükba sülen tang okadak ajanga iba tetuyuba agütsüogo.

Delhi court-i, tenüngdakba medical treatment agütsütsü

tetuyuba agütsüogo aser special consultation nungdaka Tihar jail ketdangsürtemi endocrinologist aser diabetologist ka densema AIIMS director-i tentettsüba medical board ka anepalutsütsü.

Hombarnü nikongtsütsü blood sugar level timba akümba sülen Kejriwal nen insulin "low dose" ka agütsüogo, ta Tihar jail ketdangsürtemi ashi. AAP-i iba osang ya pelashishia agizükogo. Tihar jail ketdangsürtemi ashiba agi, AIIMS doctor tem nungi

shisatsü agiba sülen Kejriwal nem Hombarnü nikongtsütsü insulin low dose unit ana agütsüogo.

Kejriwal ya March 21 Enforcement Directorate (ED)-i pua liasü. Pai tashi mangaba atema Delhi high court-i pa nem tekümzükba magütsüba sülen pa pua liasü.

Kasa mapang nung taoba Telangana chief minister K Chandrashekar Rao'er jala Kavitha-a ED aser CBI nati benokba ken o dak sendakba nung judicial custody nung yua lir. CBI-i Telangana MLC ya Tihar Jail nung apu, kong la senotsü ochi mashi ken o nung aija Enforcement Directorate (ED)-i pur yua liasü.

Maneni ED-isa, Chanpreet Singh puogo, shiba 2022 nung Goa assembly elections atema Aam Aadmi Party indang senotsü achayanger liasü, koba Delhi excise policy nung sübokrem ajanga agizükba sen liasü.



TIR YIMYIM YIMOBILEM (EDITORIAL)

DIMAPUR RASEMNÜ, APRIL (RONGCHII) 24, 2024

Rakzükratemer yimtiba

Tetetsübo Nagaland nung shishilembaba yimti tulutiba saka shitakba nungbo rakzükratemer yimti kuma aoba yimtiji asenok ajak meyong Dimapur yimti asütsü. Iba ama tensa tia tamajungji nübertemibo mangur aser majangshir saka Dimapur nung dokan amener aser business inyakertemi meteta lir. Aji oda, anogo shia Naga nung telok ka mesüra ka tenüng nung dokan purtem aser business inyakertem dang sen meshiba aser tai mashika tongloksür senchi achiba tashiyim mapatem aremer maremzüktet Dimapur nung business inyaker telongjem, Dimapur Chamber of Commerce & Industry teloki tan April 26 nungi anogo tatakük maka shishilembadak tesem ajak shibangtsü metetdaksüba yagi tensa tia majungba indang nübertem nem metetdaksür. Atangji, alima nung iba ama ozüng raksaba mapatem azüoktsüba ya government mapa lir. Iba nükjidong nung Home minister, kilo kilonseri anir mitkartem shimteta ita sen agüja ayur. Ajisüaka, asen lima nungbo kilo kilonseri dena lokti senden nung nübertem dang ozüng raksatsü ajungshiba angudang taliang shisabolur. Aji oda, joko küm metsü junga Chief minister-i dena Naga yimten ken o India den kanga junga shitaklen jembia odagi ta jembia – jembia tanübo Naga yimten nüchiso bushir telokang telok 24 kuma lemsaba osang angashidang, Naga nung yimsüsüri anir nütsüng nübo tilatiba tashi agi Nagaland dak meseploker alitsü bilemer dang ashi, Nagaland ajungtsü asoshibo kecha bilema mali asü ta shisabolua bilemer. Atangji, government-i kecha meinyaktetyonga Dimapur yimti nung tashi manger aser ozüng raksartem azüoktsü asoshibo Naga Council-i anir Naga kintem shia senso telongjem, lanur aser kaketshirtem telongjem aser tetsür telongjemtem lir, item nung jagi yimti anüksü asoshi mitkar shimer, akhi mapang yimtak tzütemonger amongba ama, anogo shia tena-tena yimti nüka mongdaksütetter ser nung asenoki asen yimti anüksüba ya tangar mapa amai bilemer asütsü akok. Ano, iba amajisa manükyonga, asenok lokti tentetem yagi asen yimti nung rakzükratema mapatem anema ola kabo adoka mapa agi sayutsü tim. Tanübo asenoki dokan purtem dang rakzükratembaji parnok dang takoksa ta bilema alitsü akok saka tesüsabo asenoksa takoksa tuluba ajurur, kechiyong dokan nung rakzükratemer nem agütsüba sen to asenoki aliba jangotsü aser osettsüset nung dokan purtem jagi enoksemer ayoker. Iba jagi tanga temeket tesemtem dang nungi kechisarina ajak nung nung Dimapur nungsa jenjang tasakba lir. Joko, Dimapur nungbo khu abenba gari aittsü mesadem aser osettsüset ayudak godown lapoka majung kümogo, iba jagi gari anendak aser godown ajak Nagaland gate adenli khakati nung lapokyonga aoba asenoki angur. Ibaji Dimapur aientsü aser renloktsü melen Khakati renloker asütsü. Item takoksa aser tebilemstüji asenok Dimapur nung alirtemi mangur saka asenoki anguba aser aginüba ajak agi Dimapur nung yi yokdaksüner. Atangji, Dimapur nung yi ayokba agi yi jenjang dalang agi talubosa angutsü, ajsüaka iba jagi Dimapur ya rakzükratemer yimti kuma aoba tensa yabo tamajungbaang kuma aotsü akok. Itemji asadanga, asenok lokti tentetemia Dimapur Chamber of Commerce & Industry purtemi ajuruba timtem ya külem timtem aser takoksa ta bilema parnok den külem ser rakzükratemer anema nokdakba tongpang nung ya shilem agitsüla. Pei yimti alima lendong, tsükchir aser rakzükratemer nungi kümzüka ayutsüba senso shia teinyaktsü mapa lir. Aji oda, asenoki asenok teinyaktsü mapa shitak inyaka asen yimti tamajungtem nungi kümzüka yutetra asen yimtijisa tajungba asütsü. Oda ashir ashi, shibaibo rakzükratemer yimti nung alir ta sünütsü? Iba tenüngji asenok dak mamongtsü atema asenok ajak asensasa asen yimti mitkar akümtsüla. Idangji dang police-tem tasü aittsü aser government aliba metetmeteter asütsü.

OLEMSABANG

Nübur Temang Anema Alitsü Tesayuba: Anü Tatsük nungi kümzüka alitsüyim

(Public Health Advisory: Extreme Heat/ Heatwave

TEINYAKTSÜTEM (Do's)

Nübur Rangpen Asoshi (For general population)

- Chief Medical Officer, Mokokchung, Nagaland

(Yashi adok nungi...)

Mapa inyaker aser kiburtem asoshi (For employers and workers)

- * Tajemtsü tzü temokong mapa inyakba tesem nung ayutsüla aser minute 20 shia tzü marok kakabo ajemtsüla.
- * Anü pua meinyaktsü merangtsüla.
- * Mapa inyakertem akhüm nung inyaktsü asoshi kilembok yanglua amshitsüla.
- * Mapa tasaktem anepdang aser nikongdang inyaktsü tasa yanglutsüla.
- * Moapu nung inyakdang mapang shia anisüngzüka amentsüla. Tajemba agi ghonda(1 hour) shia minute pungubo (5 mints) anisüngzüka amentsüla.
- * Radio angaa, TV repranga, Newspaper zünga tzü mopung osang meteta alitsü nüngdak. Tawa tanü tzü mopung osang tejangja metettsü asoshi India Meteorological Department (IMD) website <https://mausam.imd.gov.in/> nung angutsü.
- * Mapa inyaker timba bushitsüla mesüra mapa melongi inyaktsüla.
- * Mapa inyaker ajak tatsük tizüktetba nisung asütsüla. Temokong tesem nungi arurtem asoshi hopta ka dang tema nungang tatsük tizüka yimya süpar. Anungji parnok asoshi mezüng hopta nungbo anogo nung ghonda asem tema meinyaktsüla. Tanem tanemi dang mapa inyakba mapang atsülanga aotsüla.
- * Mapa inyakertem dang anü tatsük ajanga timtem adokdaksüba tsüngsü aser tamaitsütem metetdakja sayutsüla aser parnok rongnung"buddy system" koba tetezü medemer/angkopur telungtet tenzüksüla kechiyong aiben pei sasa pei dak timtem aliba merajemer.
- * Ajungben timtem lendong nung First Aid agütsütettsürpur alitsüla aser koda masüba mapang yakta teyari bushitsü asalendong yanglua alitsüla.
- * Mashisa aliba aser temang nung timtem meteta aliba inyakertem mesüra mozü techidakpur doctor den angateteper dang inyaktsüla.
- * Moapu nung inyaktsü süra cotton süoshi tepongba, kokra temang ajak küpbangtetba tola and long pants, aser tokolak anü nung mepolokdaksüi inyaktsüla.
- * Mapa inyakba tesem nung temperature aser forecast sayuba kol inoka ayutsüla.

Lokti adenshiba/Saisapong sentong nung tekümdangtsütem

(Precautions during mass gathering/sports event)

- * Moapu mesüra Kilung nung lokti adenshiba sentongtem nung tatsük adoka timtem bena arutsü ana nung lir.
- * Temang tashi amshia inyakba, anü polokba, lokti aika adenshiba, aser tajemtsü tzü, chiyungtsü aser akhümbok maliba ajanga karbo temang nung timtem bener arutsü akok.
- * Lokti ajak temang nung tzü peria alitsüla, mokonga alitsüla, anü tatsük ajanga bener aruba timtem tamaitsütem meteta alitsüla aser nüngdak süra mozü/ mozüki bushitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Northern India nung tamanger dak noklang-nok amshia amak

New Delhi, Rongchii/April 23 (Agencies): Taoba hopta Sikh nunger nokinketer telok kati India north tsütsü Punjab state kübok par yimsüung nung tekülem sentong anir agiba mechi pastor ka aser ano tamanger ka dak noklang-no aser kotaru amshia amak.

Nihang Sikhs pezü, shirnok akhi yimsü nung nokinketer telok nung züngsem ama iba ama nok-nü bener senzütsü melar aser parnoki Amritsar district kübok Sultanwind village nung April 18, 2024 nü Pastor Gurjeet Singh, alias Gurjeet Rinku aser pa tenu Gurdeep Singh dak teka sangshi, ta kinunger kati ashi.

'Lendong agütsürtemi Gurdeep Singh aser Pastor Singh dang, "Onoki taoba mapanga nenok dang tekülem sentong magitsü aser temulung memeyipdaksütsü shiogo, saka nenoki manga," ta ashi,' ta pastor indang kinungtsü Daljit Kaur aser tenük kuli akartemi ashi.

Anepdang 9:00 ako meta tekülem sentong agiba ki kima Gurdeep Singh nokdaka aliba Nihang Sikhs nunger par pezü angu.

"Pa kisüung nokdaka aliba ngua item nisungtemi pa dak ponglok aser noklang-nok aser kotari agi atsüung," ta Kaur-i Morning Star News dang ashi.

Nisung asatepba ola angashia la aser Pastor Singh nunger arsanga kimai alu aser pastor ya tenu kumzüki asema ao. Idangji yangji aliba nisung telok yagi pastor dangi meyipa noklang-nok agi ishíben atsüung, ta Kaur-i ashi.

"Parnoki pa dak tekolak nung tenük yoker teka sangshi. Pa tekolak kumzüksü mechi Gurjeet-i teka agi zükdangtsü merang aser iba mapang pa teka kanga sashia yiru aser temeyong tera agi alangzüka meyok," ta lai ashi.

Gurdeep Singh-i pa teka amshia tekolak nembangtsü merang aser iba mapang pa teka aser tekolak nung zübu tulu aket.

Adianuna dak yamaji teka sangshiba mapang o tamajung shia liasü. Khristanpur ana yagi tekülem sentong agia yimdaklir tem mesüzüker aser anasa alirtem tamangba yimsü melentsü ashi ta parnoki aitsü. Pastor Singh nem tekülem sentong ayongzüka magitsü atema aiben shiogo saka pai tashi manga ta parnoki Gurdeep Singh dang ashi.

"Taoba mapanga Nihang Sikhs yagi kü kinungbo anaben amokmerena lir, saka pai iba indang küdang kecha mashi, kechiaser ni shisabolutsü ta pai meteta lir," ta Kaur-i ashi.

Lai adianuna ya Amritsar nung aliba private Amandeep Hospital bushia anir ao. Zübu kanga tulu asüba yong mozüki

anati parnok anepalutsü memulung, ta Kaur-i ashi. Pastor Singh ya azü unit ka agia liasü.

"Parnoki azü ayimba ya khen atema anendaksü aser treatment shidakba metenzükdang sen agütsütsü ashi," ta lai ashi.

Iba sülen Kaur-i ambulance ka anepalua tena ya Amritsar nungi mile 90 pilar Ludhiana nung aliba Christian Medical College & Hospital bushia anir ao.

"Parnok Amritsar nung anepalutsü kü ket nung sen meliasü," ta Kaur-i ashi.

Iba aonungji doctor temi Gurdeep Singh tekolak nung MRI scan asü aser zübu artsü, ta lai ashi.

Tasüngnep tenaprong teka nung zübu aliba surgery agia liasü.

"Gurdeep aser Gurjeet na teka kanga aroka ranger alinung doctor temi operation agitsüsa akumtsü ta ashi," ta Kaur-i asüktema ashi.

Khristanpuri tang tashi police nem ken o magütsüi lir.

"Local media aser police tem aru, saka police-i ashishitep ken o benoktsü kecha mashi. Pastor temang junga akumba

sülen onoki ken o benoktsü," ta Kaur-i ashi.

Gurdeep Singh aser Gurjeet Singh ya Sultanwind yimdak soa inet aser Pastor Singh aser Kaur den tena jabaso ana (ka arishi küm ti aser ka arishi küm ana) den Gurdeep Singh aser pa kinungtsü aser tanur asem (ka arishi küm ti, ka 11 aser ka 18) külemi alir.

Ludhiana nungisa Pastor Vishnu Dev-ia adianuna sarasadem kanga nüngdaker ta ashi.

"Adianuna dak azüdokshiba osang angazüka ni anisüngzüik mangur. Police temi shidak bushisüngdanga ochi obendang magütsüra, onok adenshia longkak aittsü," ta Pastor Dev-i Morning Star News dang ashi.

Pastor Singh-i house church ka küm ter dak tema ketdangsüa arur aser tenui pa den yaritepa aru.

Open Doors ajanga alima nung Khristanpur alitsü linük tamajungtiba 50 asadangba 2024 World Watch List nung India ya jenjang 11 buba nung lir. 2013 küm India ya jenjang 31 buba nung liasü, saka Ato Kilonser Narendra Modi-i yimsü asü tenzüka sülen tensa tamajungba akum.

ANOGO ABEN TSÜNGREM DEN

Entsü temesüng

"Kechiyong mongozünu tepen mepungaka... aji saka ni Kibuba nung pelaseta alitsü"

(Hab. 3:17,18).

Yob-i mangyima ya asüngdang, "Entsü temesüng dak tanang chiteterna? (Yob 6:6). Masü, ibai tanang masü, saka tesola. Taküm nung tetendangba tamang dangi anir. Yisuji asen tamang tenzüksang aser renemtsüsang. Pa nungi kodang asen tenük piladir, asenok lendongi air" (Ibri 12:1).

Kodang asenok angüma aor, Tsüngrem dang ayimtener, idangji Tsüngremi ne tamang kong lir ta asüngdang. Asenoki timtemji timi agizükra iba jagi asenok tashi itshidaktsütsü. Yob-i pa timtem tematiba jenjang tonga atudang ayimoktsü, "Pai ni lepsetaka, ni pa dak amangtsü" (Yob 13:15).

Timtemi Tsüngrem taochi tali nanga agizükdaktsür. Kibubai Yob nungi pa adianutem, metettepa alir, kinünger, tembar, kilir, kinungtsü aser tanur ajak agien. Kodang meimchir yokchi agiener, asenoki Kibuba dak dang rangloker. Pai atsüka dokaka aser asenoki ajaklen Pa menguaka, asenoki temulung lema ashitsü, "Onoki memetet, saka Pai metetet" (Yob 23:8-10).

Timtemba mapangji jungkai adokba mapanga asür. Yohan asetkong nung timtema alidang sentsüwangshi jungkai adokba tulu angu (J. Adok 1:9).

Sudan nung rara tenzüka sülen tekülem ki 150 dak tema makogo



Sudanese Presbyterian Evangelical Church (SPEC), Omdurman, Sudan.

Rongchii/April 23, 2024 (Agencies): Taoba küm April ita Sudan nung rara tenzüka sülen tekülem ki 150 dak tema raksatsü mesüra samatsü, ta United States Commission on International Religious Freedom ajanga ashir.

Sudanese Armed Forces aser paramilitary Rapid Support Forces tsüngta raraba ajanga nisung takum meyirijang aika agiogo aser tamangertema kanga akoksatsüogo, aser iba mapang tekülem ki nunga tenük yoker aser raksatsür, ta USCIRF ajanga ashir.

Tang mepetmesü adoka ajanga nisung 13,000 dak tema süogo aser sepaitemi tekülem ki aser temeshi tesemtem nung tenük yoker, ta ashir.

"International humanitarian law ajanga rara mapanga tekülem ki aser tesemtem ya kanga tongtipang ama züngshir.

Article 53 liaka Sudan nung tekülem ki aser tesemtem maneni raksatsür," ta Commissioner Mohamed Magid-i sangdong ka nung ashi.

Tamangba yimsü lenirtem dak amakba aser rara ajanga tamangba yimsü tsütsü kin tilatem dak kongshiba indang tebilemtsü pai lemsatepa liasü.

January ita RSF teloki Wad Madani nung aliba Evangelical church ka nung mi senloktsü, ta Morning Star News ajanga ashir. Iba tekülem ki ya 1939 küm yanglu aser iba ya Gezira State nung tekülem ki tulutiba liasü. RSF yagi Wad Madani nungsa Coptic Christian monastery ka amak aser military base kumdaktsü.

Iba ama lendong ya ki o jen kisüung nung dang masü. 2023 küm May ita nok-nü bena alirtem tekülem ki kati aita putir ka aser par jabaso densema

aliba kangki indoktsü memulungba yong RSF temi pa tepset.

Sudan nung rara tenzüker küm ka ajungba nüngtem nung ita tetenzüklen International Humanitarian Conference alidang U.S. Special Envoy for Sudan, Tom Perriello, aser USAID Deputy Administrator Isobel Coleman dena liasü.

Deputy Administrator Coleman-i Sudan nung aliba nübür nem humanitarian assistance sen million \$100 agütsütsü sangdong, anungji October 2023 nungi tenzüka US sorkari Sudan nunger nem teyari agütsüba sen billion \$1 dak tema akumer.

Sudan nung nütsüung yongsük million 43 dak tema aliba nungi Khristanpur ya million ana mesüra shilem 4.5 shi dang lir aser rara ajanga item nisungtem tali tim atemer.

Open Doors ajanga alima nung Khristanpur alitsü linük tamajungtiba 50 asadangba 2024 World Watch List nung Sudan ya jenjang 8 buba nung lir, kong tamangba yimsü asoshi temeden agüja lir, saka non-state actors temi maneni lendong agütsür.

Sudan nung azüdokshi ajanga nisung million aika pei ki yutsür tesem balala nung jenoka lir aser SAF aser RSF tsünga yimten tashi agi raktepang nübürtem ang tim atemer. Aser rara atemdang tamangba yimsü tsütsü nütsüung tajembapur asoshi tia tamajungba akumtsü südi ta tsübor.

AO OSHI ANGAZÜKDAK: TANÜ ANGAZÜKTSÜBA OJANG



Süngernaba

(n) terunem tajung aketba süngolemba (aromatic herb)

* Süngernaba agi aon nung terunem adokdaksür.

Süngjang

(n) süngdong nung atangba tejang (fruit)

* Arem nung süngjang tapu aika angur.

OLONG PAITEP # 6766

Grid for OLONG PAITEP # 6766 with numbers 1-17 in various cells.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzuma nung senzüba - (5)

OLONG PAITEP # 6765 TELANGZÜBA

TIPIEN :

- 2. Bangsemo, 6. Tiptem, 8. Jen,
9. Talila, 11. Aren, 12.Tzübo, 14. Alia,
16. Angati, 17. Odi, 18. Azü,
19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong,
13. Ajizük, 14. Aitsü, 15. Tasa,
16. Aina.

NAI-A YA METETTER MA



April 21, 2024 nü 44th London Marathon nung asemteper 53,000 temai shilem agiba ajanga otsü tasen ka yanglutetogo. Taküm Marathon nung nisung 65,725-i shilem agitsü register asü aser parnok 54,281-i shilem agiba nungi nisung 53,000-i tembanga asem. Yaküm nisung 43,965-i London Marathon nung shilem agia liasü.

CAA kübok Chakma-Hajong nunger Assam nung lidaktsütsü; Opposition



Guwahati, April 23, 2024 (Agencies): Citizenship Amendment Act (CAA) kübok Chakma nungeri Assam nung senso akümtsü merangba kuli tawa Union minister Kiren Rijiju-i jembiogo ta Assam Jatiya Parishad (AJP) lennir aser Dibrugarh Lok Sabha candidate Lurinjyoti Gogoi-i ashi. Arunachal sorkari Chakma nunger nem senso agütsütsü memulungba ajanga iba ya

inyaktsü ta Lurinjyoti-i ashi. CAA ajanga lisopurtem temeten nung kongshitsü aser iba ya Assam aser Centre sorkartemi taa atongba lir. Assam nung alirtemi CAA magizüker aser maneni iba ozüng anema noktaksü aser ibaji Lok Sabha elections nung sayutsü ta paisa ashi. Assam nung Lok Sabha elections mezüngbuba shilem atema nüboyimdang voters-i

CAA tebilemtsü lemsatepa liasü ta Gogoi-isa ashi. Assam nungeri CAA anema maneni noktaksü kechiyong iba ajanga lisopurtem tammang tia idaktsütsü ta pai ashi. "Chief minister Himanta Biswa Sarma-i Assam anema tasa tamajung ka atonga lir. Amit Shah nungi tetuyuba ka ajanga Assam nung Hajong-Chakma refugee lakh 5 shi lidaktsütsü aser ibaji union minister Kiren Rijiju-i aibelena yimjak nung metetdaksüogo" ta Assam Congress president Bhupen Borah-ia ashi. "CAA ajanga Arunachal Pradesh ajangzüktsü ta Rijiju-i ashiba aitsür. Parnoki kidanger linüktem nungi aruba refugee magizüker. Assam nungeri iba tebiemba magizüktsü imlar aser ibaji April 26 aser May 7 anogotem votes enoktsütsü sayutsü" ta Borah-isa ashi.

Senapati district nung LS elections tanabuba shilem atema renemogo

Imphal, April 23, 2024 (Agencies): Senapati Deputy Commissioner & District Magistrate Mamoni Doley-i Lok Sabha elections tanabuba shilem agitsü dak sendakba osang lemasatep. Assembly segments kübok polling stations 228 lir aser election tiptema agitsü atema polling personnel kanga junga arangshiogo ta Doley-i ashi. Polling stations 81 tashi

tetsürtemi dang ketdangsütsü aser law & order dak sendakba maparen reprangshimogo. Central Armed Police Force (CAPF) aser state armed forces dena security lemezüktsüogo ta Senapati DC-isa ashi. "Onoki nübortem dang election nung shilem agitsü mepishir. Election mapang law & order tebilemtsü kecha majurutsü imlar" ta Doley-isa metetdaksü.

Outer Manipur parliamentary constituency nung anünga aliba tesemtem nung April 26 nü polling asütsü ta Chief Electoral Officer Manipur Pradeep Jha-i metetdaksüogo. Lok Sabha election tanabuba shilem nung vote enoktsür nisung 484,949 lir aser parnok rongnung tebur 239,140 aser tetsür 245,807 den third gender category nungi nisung 2 lir.

Mizoram nung African Swine Fever wara ajanga timtemer

Aizawl, April 23, 2024 (Agencies): Mizoram yimtiba Aizawl den külemi Champhai aser Saitual district tem nung African Swine Fever (ASF) puteta lir. Mizoram nung African Swine Fever (ASF) ajanga ak 174 süogo aser tashidak prokshia maotsü atema ak 68 tepsetogo. Mizoram nung

ketdangsürtemi wara azüoktsü atema tenokdangba aika agütsüogo. Mizoram kübok AFS puteta aliba district tem nung yimtsüng aser kiyong aika 'contaminated zones' ta sangoktsüogo. Yaküm May 8 nungi taküm April 22 tsüngda Mizoram nung ASF ajanga ak 1213 asü aser 1009 tepseta liasü.

African Swine Fever (ASF) ta Mizoram tesem balala nung prokshiogo saka ta Disease Investigation and Epidemiology deputy director Dr M Zohmingthangi-i ashi. 2021 küm Mizoram nung ASF wara ajanga takoksa jenti bentsür arua liasü aser ak aika asü. Iba ajanga Rs 534.42 crores shi akoksa liasü.

Manipur nung Khongjom Day among; Governor aser CM nati anir tetushi agütsü



Imphal, April 23, 2024 (Agencies): April 23, 2024 nü Manipur nung Khongjom War mapang rarartem aser taküm bendanga agütsürtem nem tetushi agütsüogo. Khongjom War Memorial Complex, Khebaching, Thoubal nung ayonga agiba sentong nung nisung aika aden. Iba sentong nung Manipur Governor Anusuiya Uikey-i

tongti tesemdanger aser Chief Minister N. Biren Singh-i president ama shilem agiogo. Minister, MLA aser tongtipurtemi anir Khongjom War Memorial nung naru yuja tetushi agütsü aser idangji rara nung taküm bendanga agütsürtem bilemetet. Iba sentong nung guard of honour dena military honours, general salute aser sounding of

the last post shilemtem agiogo. Paona Brajabashi kürakyanglu nem tetushi agüja nisungtemi naru yutsü aser gun salute ka agütsü. Sentong nungsa M.R. Band unit-i National Anthem atem. Iba sentong nung Chief Secretary Dr. Vineet Joshi, Security Advisor Kuldiep Singh, DGP Rajiv Singh aser administrative secretaries aden.

South China nung tzünglu kanga arur; nisung 100,000 anienogo



Bijing, Rongchii/April 23 (Agencies): China anüolentip nung aliba Guangdong province nung maneni tzünglu kanga sashia arudar aser iba tesem nungi nisung 100,000 dak tema anienogo.

Tzünglu aruba anentsü kecha temaitsü mesayuba mapang ka nung ketdangsürtemi Mongolbarnü tekümdangtsü metetdaksüogo. Tzümetzüng lendong nung tang tashi nung nisung pezü süogo aser nisung 10 samar bushidar. Alima tzi mopung melenshiba ajanga China daka kongshia tang tsüingsang mopung kanga mejungi kümogo.

Tzünglu kanga aruba ajanga Guangdong nung ayongtem aika metsüngogo aser state media-i, aso ka nung khen danga ajangshiba tziümetzü lendong ajangshitsü akok ta tekümdangtsü metetdaksüogo. Guangdong nungi noksa aser video balala ajanga yimtsüng,

alu aser yimitem aika metsüngba den apu raksar aliba aser garitem tzi nung apongdker aliba sayuogo. Iba den bendenloksema nisung 110,000 teküzmükba tesem bushi aninogo aser parnok rongnung nisung 25,000 bo jondak tejenokda jenoka lir.

Province yimtiba Guangzhou nung ketdangsürtemi April ita tziünglu 609mm aruba mangaoka lir, koba 1959 küm nungi mangaoka aruba rongnung ita ka nung tziünglu timtiba aruba lir.

Tzünglu ya Pearl River Delta tesem nung hopta ka shi kanga sashia arudar. Iba tesem ya manufacturing hub ka lir aser linük nung nütsüngyongsük timtiba aliba tesem ka lir.

Iba tesem nung nisung million 127 shi lir aser yimya agi iba tesem nung tziünglu ya September ita-ang arur. Ajsüiaka kümtem tsüngda iba tesem nung tziünglu den yipru

aser tziümetzüng mapangshia ajangshia arudar.

"Imlibilemba takaratiba nung jenja agia tziümetzüng agi konshitsü ana nung aliba tesemtem nungi ainshiang," ta tziüküm nung aliba Shenzhen yimti ketdangsürtemi metetdaksü. Iba yimti ya China nung yimti tulutiba rongnung tasembuba lir.

"Tzünglu kanga sashia aruba aser iba ajanga tziümetzüng, anentsüh, ali anenoka aiba amala lendong bener arutsüba meita atang," ta parnokisa tekümdangtsü metetdaksü.

Mongolbarnü sayaba United Nations report ajanga, tziümpung melenshiba ajanga 2023 küm Asia tamajungtiba kongshiba sayuogo. 2023 küm Asia nung tziümetzüng aser yipur tesashitiba aser timtiba aru aser iba ajanga nisung taküm aika samaba den alirongsena aika akoksaogo.

Malaysia navy helicopter ana tsüktepba sülen nisung 10 asü



Kuala Lumpur, Rongchii/April 23 (Agencies): Malaysia indang navy helicopter ana anüngtom nung tsüktepba sülen tayimtsü nung mena aliba crew 10 prongla süogo. Military parade ka atema rehearsal agiba mapang iba lendong ya ataloka liasü.

Local media-i sayuba video nung tayimtsü ana rongnung kati tayimtsü tanabuba indang rotor nung kongshiba sülen tayimtsü anaprongla ya ali nung alua tsükokba nguogo.

Iba lendong ya Royal Malaysian Navy amendaka aliba Lumut jila nung anepdang 09:30 local time (02:30 BST) nung ataloka liasü.

"Tayimtsü nung mena alirtem ajak tayimtsü tsükokba

tesem nung asüba jangjaogo aser tasümantem maitsü jangjatsü atema Military Hospital-i yokogo," ta Royal Malaysian Navy-i ashi

Navy-isa, iba lendong atalokba indang bushisüngdang asütsü atema committee ka tentettsü, ta metetdaksü.

Helicopters rongnung ka HOM M503-3 nung nisung tenet mener liasü aser iba ya running track ka nung lua tsükok.

Tanabuba Fennec M502-6 helicopter nung nisung asem mener liasü aser iba helicopter ya swimming pool ka nung tsükoka liasü.

State fire & rescue department-i ashiba agi, iba lendong atalokba indang osang

parnok nem 09:50 local time (01:50 GMT) nung agüja liasü.

Malaysia Ato Kilonser Anwar Ibrahim-i, X sabang ajanga, iba lendong atalokba osang angashia linük ajunga mang ayimer ta ashi.

"Asür kinungertem den asüku lemsateper aser iba mangyimjashi khuret koktettsü atema tashi agüjang ta sarasademja atar," ta paisa ashi.

March ita-a Malaysian coast guard helicopter ka training flight mapang Malaysia kübok Angsa asetkong nung tziüyim nung tsükoka liasü.

Helicopter nung mena aliba pilot, co-pilot aser passenger ana angopurtemi ngua kümzüka liasü.



KOHIMA AO OFFICER-TEM TELONGJEM

"Telongjem nung leniba"

TENÜNGSANG AGÜTSÜR

Er.Tongtiliba Longkumer aser Wt.ChubasanglaAnar (IAS Rtd) na jala **Kr.Imsürenla Longkumer-i** UPSC CSE 2023 tatidang nung AIR-774 jenjang nguteta takok anguba asoshi Kohima Ao Officer-tem Telongjem (KAOT) kanga pelar aser kanga nümadangteta la nem tenüngsang tulu agütsür.

Nai ngutetba takok jagi nü dak aketba tokolok aser shisatsü techira, tanen maka nendaka inyakba aser pei mapa nung bendanga agütsüba jakla tajung sayur. Item jagi tajung kümner lanurtem ajungshitsü. Nai anguba takokji na chiraba kuli dang masü saka asen kin asoshi nümadangtsü angudak ka kümogo.

Nai anguba takok kanga nüksia KAOT-i ne nem akhüm agütsür aser ano maneni tarutsü nunga nü mapa ajak nung takok lidakjangma.



Sd/-
LIMASUNEP JAMIR
President, KAOT

Sd/-
RONGSENLEMZUNG
Gen. Secretary, KAOT



CORNERSTONE

HIGHER SECONDARY SCHOOL
DUNCAN BASTI, DIMAPUR, NAGALAND

ADMISSION FOR CLASS -XI (Arts & Commerce)

SPECIAL FEATURES

- Free skill development courses on different traits.
- Different clubs for student activities.
- Atal Tinkering Lab (ATL)
- Educational Tours.
- Wi-Fi Campus.

FACILITIES

- Experienced Faculty.
- Well Equipped IT Lab.
- Library with e-book facility
- Basketball and Volleyball courts.
- Indoor stadium.
- Hostel.
- Science and Mathematics Laboratory.
- Canteen.
- Secured Campus with CCTV Cameras.
- Spacious campus with children's playground.

SPECIAL OFFER

- Scholarship available for meritorious students.
- 25 % concession on Admission fees to Cornerstone students.
- 10 % concession on Admission fees for other students with distinction in any subject.

PROSPECTUS & ADMISSION FORMS AVAILABLE AT:
Cornerstone Higher Secondary School, Duncan Basti, Dimapur, Nagaland
For more details contact: **8798859818**,
email: **cornerstoneforms20@gmail.com**

Hezbollah teloki Israel army headquarters nung missile khaloktsü

Beirut, Rongchii/April 23

(Agencies): Hamas tembar aser Iran nunger proxy Hezbollah teloki Hombarnü sangdong ka nung ashiba agi, parnoki Israel north tsütsü army headquarters nung Katyusha rockets ter dak tema khaloktsü.

Lebanon south tsütsü yimtsüngtem meita aiba asoshi telangzüba agüja iba mera ya agi, ta Lebanon telungpuri ashi.

Lebanon nungi arütsü alema Israel north tsütsü Ein Zeitim tesem nung missile 35 shi khaloktsüba putet, ta Israeli Defence Forces (IDF) ajanga ashi. Nisung asü-amaba mesüra yiruba mali aser onoki item missiles khaloktsüba tesem amak, ta IDF-i ashi.

Missiles ya Lebanon south tsütsü Arzoun len nungi yok ta IDF-i ashir.

Hamas teloki October 7 nü Israel amakba yong Gaza nung rara tenzüka sülen Israel army aser Iran-i yariba Hezbollah tsüngta anogoshi amai arütsü

alema khatemper.

Israel aser Iran tsüngta tensa kanga mejungi aliba mapang Lebanese Shiite militant telok yagi arütsü alema oa Israel mitkar dak tenük yoker amaker.

Hezbollah sangdong ka nung parnoki Ein Zeitim Base nung aliba 91st Division indang 3rd Infantry Brigade indang headquarters nung Katyusha rockets aika amshia amak ta ashi. Ibai tawa Israel-i Lebanon south tsütsü Srafa, Odaisseh aser Rab Tlatin yimtsüngtem amakba asoshi telangzüba agütsüba lir.

Israel-i yimtsüng asem nungya Hombarnü amak ta Lebanon indang National News Agency ajanga ashi.

October 7 sülen Lebanon nung nisung 376 shi tepsetogo aser item rongnung Hezbollah fighter timba saka civilian-a 70 asü, ta ashir.

Israel-ia par sepai ter aser civilian ti takum samaogo ta ashir.

Laureus Awards: Djokovic nem Sportsman of the Year naroküm agütsü



Rongchii/April 23, 2024 (Agencies): Hombarnü Laureus Awards ceremony nung Novak Djokovic nem World Sportsman of the Year naroküm agütsüogo. Pai iba naroküm ya otsüsütsüsa pongubenbuba agizükogo. Kasa mapang nung Spanish footballer Aitana Bonmati nem Sportswoman of the Year award agütsüogo.

Grand Slam 24 tashi koker aliba asayar Djokovic-i iba naroküm agizükba sülen Roger Federer den kasasa kumogo.

Arishi kum 36 tain Djokovic-i taoba kum Grand Slam asem aser ATP Finals koka liasü.

"Iba naroküm pongbenbuba anguba atema kanga pelar. Arishi kum 24 tain asüba mapang 2012 kum mezüngbuba iba naroküm agizükba bilemteter," ta Djokovic-i ashi.

"Kum 12 sülen ni maneni idaki arutetba atema kanga nema danga bilemer aser taoba

kum takok tajung anguba bilemtetshir," ta paisa shisem.

Bonmati nem Sportswoman of the Year award agütsüogo aser la ya football asayatem rongnung iba naroküm agizükba mezüngbuba asayar kumogo, aser iba den taoba kum tetsür World Cup akokba atema la Spain tetsür team-mates tem dena team naroküma agizükogo.

Spain tetsür football asaya puti otsü nung taoba kum mezüngbuba World Cup akokba atema parnok nem World Team of the Year award agütsüogo.

Kasa mapang nung England nung international asayar Jude Bellingham nem, Clasico akokba asaya nung tatembangbuba goal idaktsüba sülen anogo ka lir World Breakthrough of the Year award agütsüogo.

Bellingham ya Real Madrid nung mezüngbuba asayaba kum team nung asayatem ajak

rongnung goal timtiba (21) idaktsüba asayar lir.

Gymnastics asayar Simone Biles nem World Comeback of the Year award agütsüogo. La kum ana masayai aliba sülen meyipa arur taoba kum Belgium nung World Artistic Gymnastics Championships nung medal pezü ngua liasü.

Maneni nungtugu tennis asayar Rafael Nadal indang foundation nem Sport for Good award agütsü aser Diede de Groot-i, World Sportsman of the Year with a Disability award ngua liasü.

Dutch nung wheelchair tennis asayar yagi taoba kum calendar Grand Slam asembenbuba atonga koka liasü.

Australia nung arishi kum 14 tain skateboarder Arisa Trew nem World Action Sportsman of the Year award agütsü.

Iba award ya 2000 kum nungi agütsü arudar.

Rafael Nadal taküm Laver Cup nung asayatsü



Rongchii/April 23, 2024 (Agencies): Taküm September ita Berlin nung asayatsü aliba Laver Cup nung Rafael Nadal Team Europe nungi asayatsü, ta asayamung ayongertemi Hombarnü metetdaksü.

Grand Slam 22 koker aliba asayar atema pa indang career nung tang tatembangbuba iba asayamung nung asayatsü akok.

Nadal shiba June ita arishi kum 38 ajungtsü, pa hip yiruba ajanga 2023 kum tepeyong amai aser taküm kuma season tetenzüklen masayatetsüsa akümba sülen pa taküm tatembangbuba asayatsü imlar.

Spain nung asayar ya 2022 kuma Laver Cup nung Roger Federer den tarep asaya

nung shilem agia liasü. Roger Federer atema iba asayamung ya pa indang career nung tatembangbuba asayamung liasü.

Taküm Laver Cup nung Nadal, kulem Spain nung asayar Carlos Alcaraz, Daniil Medvedev aser Alexander Zverev nung den külemi asayatsü. Iba team ya coach Bjorn Borg lenisüba nung September 20 nungi 22 tashi asayatsü.

"Ni team Europe nungi Berlin nung Laver Cup asayatsü atema kanga pela bilemer," ta Nadal-i ashi.

"Ni Laver Cup asayaba mapang tajangshiba tajung aika ajangshiogo kong kum ana tejkadang London nung Roger

den tatembangbuba asayaba densema lir.

"Kü indang career nung tang ya kechi maongka agütsüdir ajak nung asayaner," ta Nadal-i ashi.

Nadal taküm January ita Brisbane nung asaya, ajisüaka pa yirushiba sülen Australian Open nung masayatet aser ano ita asem tashi temang anepalua liasü.

Pa taoba hopta Barcelona Open nung maneni asaya ajisüaka tanabuba round nung tsükatok. Pai iba asayamung ya 12ben koker lir.

Taoba mapang world No. 1 asayar, shiba tang 512buba nung lir, pai kum ana tejkadang otsüsütsüsa French Open 14benbuba akokba sülen tang tashi nung asayamung ka danga koka mali.

Taküm Team World ya coach John McEnroe lenisüba nung asayatsü aser team nung Australia nung Alex de Minaur aser US nung asayar Taylor Fritz aser Tommy Paul nung densema lir.

NBA-i Junior boys atema selection trials ayongzüker

Dimapur, Rongchii/April 23 (TYO): 74buba Junior National Basketball Championship atema Junior boys basketball team selection trials ayongzüker Nagaland Basketball Association (NBA)-i metetdaksüogo.

Iba asayamung ya Indore, Madhya Pradesh nung May 8 nungi 14 tashi asayatsü, kong linük ajunga nungi junior basketball asayar tajungtiba tem adenshia asayaba angutsü.

Nagaland team atema trials ya tešem ana nung agitsü. Dimapur nung trails ya April 26 nü JVF Basketball Court, Signal Angami nung nikongtsütsü 3 ako nungi tenzüka agitsü. Kasa mapang Kohima nung trails ya Don Bosco HSS Basketball Court nung April 27 nü 2 ako nungi tenzüka agitsü.

Asayatem ajak trials-i kit ajak aser iba den original birth certificates aser aadhar card bener arutsü NBA-isa metetdaksüogo.

BFI official sangdong ka ajanga ashiba agi, iba asayamung nung asayatsü atema asayar ka 01.01.2006 nü mesüra iba sülen asor ka asütsüla. Maneni asayar ka indang birth certificates ya pa asoba kum mesüra pa sor kum pongu tsüngda agizükba asütsüla.

Trails dak sendakba nung osang tejangjaba agitsü atema item number; 94360 16529 (Kohima) aser 70056 20288 (Dimapur) nung tongteprateptsü asoshi Nagaland Basketball Association Honorary Secretary, Sentiningsang Longkumer-i metetdaksüogo.

Akula-i Batra ajateta India No.1 TT asayar kumogo



Rongchii/April 23, 2024 (Agencies): Mongolbarnü sayaba ITTF Chart nung jenjang 38bubai atuba sülen CWG mixed doubles champion Sreeja Akula-i Manika Batra ajateta India tsür table tennis asayatem rongnung ajak dang temabai tuogo.

Sreeja jenjang ka tejkadangi atu aser Manika shiba India tsürtem rongnung TT asaya nung mapang talangka temaba jenjang nung liasü la jenjang ana asepzüka lua tang 39buba nung lir.

Arishi kum 25 tain Sreeja-i taküm kanga jung asaya arudar. Lai January aser March ita WTT Feeder Corpus Christi aser WTT Feeder Beirut titles kokogo aser iba den Goa nung WTT Star Contender asayamung quarterfinal tonga asaya liasü.

Sreeja-i Sharath Kamal den külemi 2022 Commonwealth Games tarep temeyoktep

asaya nung gold medal ngua liasü.

Rankings nung Yashaswini Ghorpade aser Archana Kamath na maneni jenjang 99 aser 100buba nung lir.

Tebu asayatem rongnung Sharath maneni temaba jenjang nung lir. Pa rankings nung 37buba nung lir aser G Sathiyana o Manav Thakar na jenjang melentepa 60 aser 61buba nung lir.

National champion Harmeet Desai shiba ita ishika tejkadang India nung rongnung temaba jenjang nung aliba asayar liasü, pa maneni asepzükalua tang 64buba nung lir.

India team Paris Olympics team events atemabo qualify süatokogo.

Tetsür aser tebur kija asaya nung asayar kaka asayatsü asoshi Table Tennis Federation of India May 16 nü iba mapang world rankings dak ajemdaker asayar shimtsü.

BILEMDANGANG

"Tajungba maküm tashi akokba tashi meranga inyangang."